



Komunikadu Imprensa
12 Outobru 2018
Distritu Covalima

Komunidade iha Suku Zulo iha Sub-distritu Zumalai apresia atividade treinamentu hosi JSMP iha sira nia suku

Iha 10 Outobru 2018, JSMP kontinua fasilita treinamentu ba lideransa komunitáriu nomós komunidade sira iha Suku Zolu, Sub-distritu Zumalai, Distritu Covalima ho partisipante hamutuk ema nain 30 ne'ebé kompostu husi fetu 20 no mane 10.

Treinamentu ne'e ho objetivu atu hasae koñesimentu lideransa komunitáriu nomós komunidade sira nian kona-ba direitu labarik, tipu krime hasoru labarik, oinsa halo denuncia ba krime ruma no prosedimentus legais relevante sira relasiona ho sistema justisa formál.

Materia iha sesaun treinamentu ne'e foka liu ba direitu labarik, autór relevante sira ne'ebé mak iha obrigasaun atu proteze labarik, protesau labarik tuir lei no nasionál no internasionál, knaar servisu sosial sira. Aleindé diskuti mós tipu krime sira hasoru labarik, no ninia impaktu, artigu relevante sira iha Kódigu Penál ne'ebé proteze labarik no idade ba responsabilidade kriminal no sentesa ba delikuento juvenil.

“Labarik sira dalabarak hasoru prátika violénsia oioin iha sira nia iha uma-laran, iha ambiente eskolár no iha sosiedade, tanba maioria sosiedade hanoin no fiar katak violénsia nu'udar meiu ne'ebé aseitavel atu aplika disiplina no eduka labarik sira. Atividade ne'e nu'udar resposta ida atu hasae koñesimentu komunidade sira iha area rurál atu kumpriente saida mak lei define kona-ba labarik sira no saida mak tenke halo bainhira krime ruma akontese hasoru labarik sira,” dehan Luis de Oliveira Sampaio, Diretór Ezekutivu JSMP.

JSMP hanoin katak informasaun sira ne'e importante atu kontinua habelar ba komuidade sira liuliu ba inan fetu sira iha área rural, relasiona ho aktu krime ne'ebé hasoru labarik sira. Tanba ne'e duni materia ne'e bele sai nu'udar mata dalan ida hodi ajuda inan no aman nomós lideransa komunitariu atu kolabora hodi tau matan ba labarik sira no proteze labarik sira hosi kualker forma violénsia hasoru labarik sira.

Reprezentante husi Suku Zulo Sra. Odete Soares, ne'ebé hetan delegasaun husi xefe suku iha ninia abertuta hato'o katak, Suku Zulo primeravés simu treinamentu hanesan ne'e. Nia hatutan katak materia ne'e importante tebes liuliu nu'udar fetu no inan iha área rurál asume knaar oioin atu sustenta sira moris no tau-matan ba labarik sira.

Tanba ne'e Sra. Odete Soare apresia tebes ho prezensa JSMP iha sira nia suku, tanba bele mai hatutan informasaun sira ne'ebé durante ne'e sira nunca asesu, Nia akresenta katak partisipante sira ne'ebé ohin loron partisipa iha treinamentu ne'e sei sai hanesan mata dalan ida hodi bele hatutan hikas informasaun sira ne'ebé ba komunidade seluk liuliu ba inan fetu sira.

Durante treinamentu ne'e, comunidade sira hatudu sira nia interese boot tebes hodi rona esplikaun husi JSMP. Aliende ne'e sira mós kontente tebes tanba ida-ne'e nu'udar esperensia primeriavés ne'ebé sira hetan treinamentu hanesan ne'e.

Estaquie Barreto nu'udar Xefe Aldeia Suku Zulo, hato'o katak, nu'udar xefe aldeia iha reponsabilidade boot ida mós atu asegura seguransa ba labarik sira iha suku laran. Aleinde ida-ne'e, xefe aldeia mós iha responsabilidade atu tau matan no rezolve labarik sira ne'ebé envolve iha atividade kriminál iha suku laran ka sai nu'udar vítima hosi krime ruma. Liután xefe aldeia hatutan treinamentu ne'e facilita ona sira nia koñesementu baziku atu hatene oinsa bele proteze no prosesu kazu sira tuir lei haruka. Sr. Barreto mós dehan katak iha sosiedade inan sira mak gasta tempu barak liu hamutuk ho labarik sira, tanba ne'e sira organiza no halibur inan feto sira maka barak tanba informasaun ne'e importante tebes ba sira.

Treinamentu ne'e realiza tanba hetan finaseiru hosi doador Embaixada Canada iha Jakarta-Indonezia.

Atu hetan informasaun liután bele kontaktu ba:

Luis de Oliveira Sampaio
Diretór Ezekutivu JSMP
E-mail: luis@jsmp.tl